


# pānui kura



TAU: 20 WĀHANGA: 4 WHĀNAU:

11 o Hakihea 2018

Me wehi ki a Ihowa.

Me whakahōnore a Kīngi Tuheitia rātou ko tōna whare.

Me tangi ki a rātou kua mene atu ki te pō, ki ngā tōtara haemata kua riro atu i a Hine nui te pō, moe mai rā koutou.

Me mihi ka tika ki a tātou e hāpai ana i ngā mahi o te ao kikokiko nei.

Tēnā tātou katoa.

## He Mihi

Nei rā te mihi ki a Toma rāua ko Te Tatau, kua whai wāhi ki te whakamātautau mō te tīma U14 o Aotearoa mō te poitūkohu. Tūmeke kōrua!

## Haerenga Kura Tuakana

I wehe moata ngā tuakana i te ata nei ki Tamaki Makaurau. Kāre e kore he haerenga mīharo hei whakakapi i ngā mahi o te tau nei.

## Rā Whakamutunga mō te tau

Kua pātai mai ētehi āhea mutu ai te kura mō te tau nei, ko te **Rātū 18 o Hakihea** te rā whakamutunga mō te tau. Ka mutu te kura i te 12 karaka.

## Ngā Rā Kura 2019

Wāhanga 1 31/01 - 13/04

Wāhanga 2 29/04 - 06/07

Wāhanga 3 22/07 - 27/09

Wāhanga 4 14/10 - 19/12

(E rua ngā rā kaiako i waenganui tau)

## Mauri Tau - Wiki 8

Kua riro mā te akomanga o **TE WHAKAMARIE** te tiwhikete mō te akomanga kaha ki te hāpai i ngā uara o te kura. Kua riro ā w mā te akomanga o **TE AROHA/TE TUMANAKO** te tiwhikete mō te tiaki i a Papatūānuku. Ka wani kē!!!

Ka huri hoki ngā mihi ki ēnei toki:

**Te Aroha/Te Puāwai** - Iharaia Kingi-Tutaki

**Te Piringa/Te Tūmanako** - Ngahau Gabel-Davis

**Te Whakapono/Te Rangimārie** - Rutangiwhenua Jackson

**Te Atawhai** - Piri ki te Aroha Lewis

## Pōtae Kura

He pai ki te kite te nuinga i whānau e mau pōtae tika ana i te kura. Nei rā te mihi ki a koutou ngā whānau kua hoko pōtae kura mō a koutou nei tamariki.

## Pūtea Waka

Tēnā koa whakahokia mai i mua i te Rāmere 14 o Hakihea. ☺

## KIA MATAARA

17 o Hakihea

Pō Tuku Taonga

5:30 - 7:30 karaka

18 o Hakihea

Rā whakamutunga

12:00 karaka

# TŌKU MĀPIHI MAUREA KURA KAUPAPA MĀORI

## Kaitahi / Po Tuku Taonga

Hei te Pōhina tū ai tēnei kaupapa mō te kura whānui. Ka tīmata i te 5:30 karaka, ka mutu hei te 7:30 karaka.

He īnoi kia mau ia whānau he kai. Kei raro iho nei ngā whakaritenga:

Whānau A-0 - mauria mai he huawhenua, huamata

Whānau P-W - mauria mai he purini

Mā te kura ngā miti e whakarite.

## Papa Takaro


I whakatau te Poari kia whakahoungia etehi wahanga o te papa tākaro tuakana. Ko te tumanako tērā ka oti ngā mahi i mua i te tīmatanga o te kura ā tērā tau.

Ngā mihi ki a koutou ngā whānau i tuku mai i o koutou whakaaro.

## Hotaka Manaaki (Ata)

I mua i te mutunga wiki ka tuku atu he pepa patai ki a koutou mo te Hotaka (Ata) a te tau hou. I tēnei wāhanga kua pikau nei te kura i ngā utu heoi tee taea te mahi penei mō ake tonu nō reira kei te kohikohi whakaaro te Poari. Kia kaha ki te tuku mai i o koutou whakaaro.

## Project Energise



**MIITI ME NGĀ KOOWHIRINGA MIITI**

**IKA POOKAI**

**Raarangi kai:**

- 4 o ngā hooripi ika
- 1 zucchini – topetopehia
- 1 kapikama – topetopehia
- 2 ngā kaaroti iti – tapatapahi kia rauti
- 1 – 2 o ngā peka kaariki – penupenutia
- 2 ngā pune nui o te hinu oorewa
- 2 ngā reemana – topetopehia
- Tote me te pepa kia taawara

Takaoraora ko ngā huawhenua ki teetehi oko, aa, rau atu te hinu oorewa.  
Tapahi e 4 ngā tin foil e 40cm te roa.

Wawaahi te kooraringa huawhenua kia 4 ngā waahanga, aa, rau atu ko ngā huawhenua ki te waenganui o te foil. Rau atu te ika ki runga, koorengarenga te tote me te pepa, aa, ringhia te wai reemana.  
Pookai ngā tahataha o te foil kia taupoki kia tika.  
Tunu mo te 15 – 20 meneti, 220degrees C.  
I toona otinga, kokotaha atu me te rahi, te riwai, te kumara raanei.  
E taea ana te whaangai kia 4

He mea hanga e Sport Waikato 2018

## Haerenga ā Kura

Hei te Rāapa 12 o Hakihea ka haere te kura teina ki Waterworld hei whakanui i ngā mahi a ngā tamariki, hei whakakapi i ō tātou nei tau. I te mea he haerenga ki te taha wai, me tautoko mai ngā whānau kia tutuki i a tātou ngā nama, arā, te pakeke ki te tamaiti (ratios). Kāre e kore tokomaha ngā tāngata ki reira hoki i tēnei wā o te tau! Ka haere mā runga pahī. Ka wehe atu i te kura i te 9:30 karaka. Ka hoki mai ki te kura i te 2:30 karaka.

## Ngā taputapu hei kawē atu

Pōtae kura

Tihate kura

Pātara inu wai māori

Rongoā

Kai mō te rā

Kākahu kauhoe

Tāora

Pēke kirihou

## Haerenga - Waterworld

E whakaae ana ahau kia haere a:

\_\_\_\_\_

ki Waterworld i te Rāapa 12 o Hakihea 2018.

E wātea ana ahau ki te āwhina.

Āe / Kāore

Waitohu: \_\_\_\_\_

Nā ngā Kaiako o te Kura Teina.



# TŌKU MĀPIHI MAUREA KURA KAUPAPA MĀORI

## Kākahu Hākinakina

Mehemea he kākahu hākinakina ōu ki te kāinga, tēnā koa whakahokia mai i mua i te Rāmere.

## Pukapuka Whare Matauranga

Kia kaha ki te whakahoki mai i ngā pukapuka whare mātauranga ki te kura. Me tae mai i mua i te Rāmere 14/12/18.

## Whakaaro mō te wiki

*"Kia mau ki te aka matua; kei mau ki te aka tāepa."*

Me mau ki ngā mea whai take, ngā kaupapa motuhake.

Ngā manaakitanga.

Laura

